

մինչև իսկ մեզ մօտ — Եւրոպայում» (Ա. 202) :

«Արովեանի պապը, — ասում է Հաքստհաուզէն, — սովորութիւն է ունեցել՝ ամէն տարի իր կնոջ եւ որդիների հետ միասին ուխտի երթալու Էջմիածին: Հայերի մօտ բարեպաշտական սովորութիւն է՝ բոլոր հինգ մեռելոցներին յարգել հանդուցեալների յիշատակը: Այդ օրերը նրանք զերեգմանատուն են տանում՝ միս, հաց, գինի, պտուղներ, օրհնել տալիս հոգեւորականների ձեռքով եւ աղքատներին բաժանում: Սովորութիւն է նաեւ՝ այդ օրերին տեղական եկեղեցուն առատ նուէրներ տալ: Բայց ամենից առաջ՝ իւրաքանչիւր մէկը, եթէ միայն հնարաւորութիւն ունի, պատիւ է համարում իրեն՝ այդ օրերին պատրիարքանիստ Էջմիածնի Մայր Աթոռին նուէրներ տանելու: Այսպիսով, անվերջ նուէրներ էին հոսում այնտեղ՝ Տաճկաստանից, Պարսկաստանից, Հնդկաստանից, Եգիպտոսից, Կ. Պոլսից, Մոսկուայից, Պետերբուրգից, Հաշտարխանից: Իսկ նրանք, որոնք որ իրենց նուէրները անձամբ են այնտեղ տանում, վերադարձին պատմում են յուզմունքով եւ արցունքով, թէ ինչպէս իրենք գնացել են այդ սուրբ վայրը, տեսել հայոց եկեղեցու կենտրոնավայրը, թէ ինչպէս կաթողիկոսը օրհնել է նրանց, ձեռքը գլուխների վրայ դրել, թէ ինչպէս իրենք համբուրել են նրա սուրբ ծունկը, ստացել կաթողիկոսի օրհնած մի բաժակ գինին եւ սուրբ նշխարը:

«Արովեանը պատմում է: Իմ պապի տանը ուխտագնացութեան պատրաստութիւնները տեսնում էին երկար ժամանակ առաջ: Իմ հայրը եօթ տարեկան է եղել, հօրեղբայրս էլ ինն տարեկան, երբ նրանց առաջին անգամ էջմիածին են տարել: Նրանց հագցնելիս են եղել ամենաընտիր կերպասից եւ մետաքսից կարած նոր հագուստներ. մէկ՝ փայլուն, մոյգ-կարմիր հագուստներ, մի երկրորդ անգամ՝ խիստ կանաչ, ուրիշ առիթով՝ կապոյտ կամ դեղին հագուստ: Կարճ՝ ամէն տարի մի նոր գոյնի հագուստ: Կօշիկները լինում էին կանաչ կաշուց կարած, որ հիանալի կերպով պատրաստում են ձիւ մորթուց: Բայց դա շատ թանկ արժէ, ուստի առնել կարող են միայն հարուստ, մեծատուն մարդիկ: Տղաները այդպիսով փայլում էին եւ գեղեցկանում հրեշտակի

նման: Մի դաշոյն խրում էին գօտում, մի փոքրիկ սուր էլ՝ կողքից կախում: Նրանք ճամբայ էին ընկնում՝ նստած կայտառ, սլացիկ ձիերի վրայ: Երկու-երեք աւանակներ տանելիս են եղել վանքի նուէրները: Մեծ հայրը, կնոջ հետ միասին նստած իր՝ սքանչելիօրէն զարդարուած նոյսի վրայ, գնալիս է եղել առաջից, իսկ յետեւից՝ բազմամարդ քարվանս: Ամէն մի գիւղի մօտ մարդիկ խմբուելիս են եղել եւ իրար ասելիս. «Ահա նորէն ուխտի է գնում բարեպաշտ մարդը: Ո՞վ կարող է այդչափ բան անել»: Դեռ հազիւ հասած վանքի մօտերը՝ նրանց դիմաւորելիս են եղել ցած աստիճան հոգեւորականներ, նրանց ընդունելու, ինչպէս եւ ծառաներ՝ ձիերը տանելու համար: Վանքի բակում եպիսկոպոսներ եւ վարդապետներ են դիմաւորել նրանց, ոմանց կաթողիկոսն է ուղարկելիս եղել հիւրերին ընդունելու համար, ոմանք էլ իրենք են եկել ընդառաջ, որպէս հին բարեկամներ: Ամէն մէկը ցանկացել է հիւրերին իր խուցը տանել: Բայց անհամբեր պատրիարքը նրանց իր մօտ է ընդունել» Ա. 203-206) :

Շարունակութեան մէջ Հաքստհաուզէն առաջ է բերում Արովեանի նկարագրութիւնը այն ջերմ ընդունելութեան մասին, որ վերջինիս պապը ամէն անգամ գտնելիս է եղել կաթողիկոսի կողմից, էջմիածին ուխտ գնալով:

«Պատրիարքը իմ պապի հին ու սիրելի բարեկամն էր», որպէս այդպիսի էլ նրանք վերաբերում էին իրար:

Նոյնպիսի սրտազին ընդունելութիւն է ցոյց տալիս եղել կաթողիկոսը նաեւ Արովեան ընտանիքի բոլոր անդամներին, մեծից մինչև փոքրը, որպէս իր հարազատների:

«Իմ հայրը», — ասում է Արովեան, — «միշտ էլ պատմում էր ինձ այդ ամէնի՝ որպէս իր մանկական ամենասիրելի յիշողութիւնների մասին»:

Ապա մանրամասն նկարագրութիւն ենք գտնում այն մասին, թէ ինչպէս էին վանքի միաբաններին բաժանում բերած նուէրները:

«Ամէն մէկը, պատրիարքից սկսած մինչև յետին ժամկոչը, ստանում էր իր նուէրը»: Ամբողջ գումարը, բացի կաթողիկոսին տրուած նուէրից, 50-60 արծաթ ուռքի էր անում սովորաբար: Միաբանների թիւն էլ եղել է՝ 80-100: